

ՀԱՃՐՆԻ ՀԵՐՈՍԱՄԱՐՏԸ. ՊԱՐՏՈՒԹՅԱՆ ՊԱՏՃԱՌՆԵՐԸ ԵՎ ՊԱՏԱՍԽԱՆԱՏԿՈՒԹՅԱՆ ՀԱՐՑԸ*

ՍՈՒՐԵՆ ՍԱՐԳՍՅԱՆ

Բանալի բառեր՝ Կիլիկիա, Հաճըն, հերոսամարտ, ինքնավարություն, տնտեսական շահեր, ինքնապաշտպանություն, պարտություն, ֆրանսիական զինվորական իշխանություն:

Նախաբան

1375 թ. Կիլիկիայի հայկական թագավորության անկումից հետո Հաճընին տիրացավ Օսմանյան թուրքիան: Եղեռնի տարիներին տարագրության ու ջարդերի ենթարկվեցին նաև հաճընցիները: 1918 թ. հոկտեմբերի 30-ին՝ Մուրտուսի զինադադարից հետո, Կիլիկիան զինազրաված ֆրանսիական ուժերի ղեկավար գնդապետ Էդուարդ Բրեմոնը¹, ժամանելով Կիլիկիա, հայտարարեց, որ հայերը պետք է «տեղ գառնան իրենց երկրին: Մենք պիտի առաջնորդենք զիրենք, մինչև որ անոնք աճին և սկսին ինքզինքնին կառավարելու գործին հաջողիլ»² և «պէտք է այժմէն պատրաստէք վարչագէտ մարդիկ երկրին վարչութիւնը ձեռք անելու համար»³: Կիլիկիահայերը, հավատալով այդ խոստումներին, 1919 թ. սկսեցին վերադառնալ և վերականգնել հայրենի օջախները: Մարտ ամսվա ընթացքում չուրջ 250 ոստիկաններով Հաճըն է մտնում ոստիկանական սպա Պողոս Թուրսարգսյանը, որին հետևում են 300 հայ ընտանիքներ: Մարտի 29-ին հաճընցիները, հեռադատան տնօրեն Համբարձում Էվիրանյանի ատենապետությամբ, 11 հոգուց բաղկացած Ազգային միություն են կազմում: Քաղաքի թուրք կառավարիչի փոխարեն մայիսի 7-ին նշանակվում է Արմենակ Քերիճյանը: Դա առաջացնում է Կիլիկիայի 60 հազար թուրքերի դժգոհությունը: Նրանք առավել աշխուժացան, երբ անգլիացի զեներալ Դեյվիդ Մեջը, ֆրանսիացի գնդապետ ժերար Փիոփափին ու Սաի ֆրանսիական կառավարիչ կապիտան Թեյարդան հայտնեցին, որ զինուժի պակասության պատճառով անհնար է Հաճընը ներառել զբաղման գոտու մեջ և կայազոր թողնել⁴:

1920 թ. Կիլիկիայում ապրում էր ավելի քան 150 հազար հայ: Սակայն ֆրանսիական վարչությունը որևէ գործուն միջոց չձեռնարկեց նրանց ան-

* Ներկայացվել է 11. III. 2022 թ., գրախոսվել է 23. III. 2022 թ., ընդունվել է տպագրության 07. VI. 2022 թ.:

¹ Գնդապետ Էդուարդ Բրեմոնը 1919 թ. հունվարի 1-ից 1920 թ. սեպտեմբեր եղել է Կիլիկիայի ֆրանսիական վարչական վերահսկողության ղեկավարը:

² Ի գ մ ի ը Լ ե ա ն. 1964, 210:

³ «Կիլիկիա» (Աղանա), 03. VI. 1919:

⁴ Գ ա ս պ ա ը յ ա ն. 2005, 178:

վտանգությունն ապահովելու համար: Ավելին, Թուրքիայի մասնատմանը ձեռնամուխ եղած Անգլիային հակառակ, Ֆրանսիան ձգտում էր պահպանել նրա ինքնուրույնությունը: Պատճառը Ֆրանսիական կապիտալի շահագրգռվածությունն էր և գերիշխող դիրքը Թուրքական տնտեսությունում: Օսմանյան պարտքի 60,31 տոկոսը բաժին էր ընկնում Ֆրանսիային (Անգլիային՝ 14,9, Գերմանիային՝ 14,19)⁵: Ֆրանսիան առավելություն ուներ նաև ներդրած կապիտալներով: Դրանք կազմում էին 50,58 տոկոս (Անգլիային՝ 14,36, Գերմանիային՝ 35,06)⁶: Ինչպես նշել է Բեռլինում Թուրքական դեսպան Մուխթար փաշան, «Ֆրանսիայի քաղաքականությունը Թուրքիայի նկատմամբ պայմանավորված էր նրա դրամատոների բուռն ցանկություններով»⁷:

Ֆրանսիայի շահերը Կիլիկիայում ընդգրկում էին նաև կրթամշակութային ոլորտները (Ֆրանսերենը դարձել էր երկրորդ լեզու, 1914 թ. Թուրքիայում գործում էին 500 ֆրանսիական դպրոցներ)⁸: 1914–1918 թթ. Համաշխարհային պատերազմը չխաբիւեց այդ համերաշխության հիմքերը: Հենց այդ պատճառով Ֆրանսիան «մեզ խաբեց, խոստանալով Կիլիկիան կառավարել իբրև հայկական երկիր մը, մեր կեանքին պահպանութիւնը երաշխաւորելով, ու յետոյ, թողլով որ 20.000 հայեր ջարդուին իր աչքին առջև»⁹: Տեղերում իշխանության դեկին մնացին Թուրք պաշտոնյաները, որոնց «գերակշռող մասը մոլի իթթիհատական գործիչներ էին»¹⁰: Թուրք-քրդական գինված խաժամուժը և քեմալիստները շարունակեցին երիտթուրքերի հայաջինջ քաղաքականությունը: 1920 թ. սկզբներին ֆրանսիական զորքերը սկսել էին դուրս գալ Կիլիկիայից և այն (ներառյալ՝ Հաճընը) հանձնել Թուրքիային¹¹: Քեմալականների առաջին թիրախը դարձավ հայաբնակ Մարաշը¹²: 1920 թ. հունվարին նրանք ներխուժեցին քաղաք: Հայերը թեև ինքնապաշտպանության դիմեցին, սակայն ընդհանուր հրամանատարության բացակայության, գենք-գինամթերքի անբավարարության և այլ պատճառներով պարտվեցին. «Մարաշի դէպքերուն կարմիր և դժոխային ոսկեբոլոր»¹³ կազմող դրուագը ֆրանսական զորքերուն դաւաճանական նահանջն է, որ ցարդ անբացատրելի կը մնայ, ամբողջ աշխարհի ու նույնիսկ Կիլիկիոյ վարիչներուն համար, որոնք այս ամէնը «ահաւոր սխալի մը կը վերագրեն և անոր պատասխանատուները կը փնտռեն ...»¹⁴:

⁵ Ллойд Джордж. 1957, 402.

⁶ «Новый Восток» (М.), 1923, 475–476.

⁷ Боев. 1964.

⁸ Кемаль Мустафа. 1929, 145–146; Մ ա ֆ ր ա ս յ ա ն. 2019, 67:

⁹ Տե՛ս Հայաստանի ազգային արխիվ (այսուհետ՝ ՀԱԱ), ֆ. 430, ց, 1, գ. 817, թ. 19–39:

¹⁰ Մ ա հ կ յ ա ն. 1970, 127:

¹¹ Ավելի ուշ՝ 1921 թ. մարտի 9-ին, կնքված Ֆրանս-Թուրքական համաձայնագրով Կիլիկիան ամբողջությամբ հանձնվում է Թուրքիային:

¹² Մարաշում տեղի ունեցած ցավալի իրադարձությունների մասին առավել հավաստի և անկողմնակալ նկարագրությունը տրված է անմիջական ականատես, Մարաշի ֆրանցիսկյան վանքի վանահայր Մատերն Մյուրեի «Մարաշի ջարդը 1920 թ. փետրվարին» գրքովում (Materne. 1921):

¹³ Բբուկ արեմտահայերենում փետուրին էին ասում:

¹⁴ Ն ա թ ա ն ե ա ն. 1951:

«Մարաշում սխալ հասկացողութեան մը արդիւնքում»¹⁵ թուրքերը սրի քաշեցին 13.600 հայի և ավերեցին քաղաքը¹⁶։ Մարաշից հետո թուրքերը մարտին հարձակվեցին Հաճընի վրա, որտեղ նրանց դեմ պաշտպանությունը կազմակերպված բնույթ կրեց և «պէտք է պանծացուն դալիք սերունդներուն օրինակ ըլլալու համար»¹⁷։ Սակայն Մարաշի աղետից հետո արդեն որոշակի է դառնում, որ Փրանսիան Կիլիկիան թողնելու է թուրքերին, և նման դիվանագիտական խարդավանքների զոհը պետք է դառնար ոչ միայն Հաճընը, այլև ողջ Կիլիկյան Հայաստանը։

Հաճընի ինքնապաշտպանությունը

Հաճընի ութամսյա ինքնապաշտպանությանը, որ «կը յատկանշուի իր տեւողութեամբ, կազմակերպուածութեամբ եւ գինուորական հնարքներով»¹⁸, պատմագիտութեան մեջ անդրադարձներ եղել են, սակայն դեռևս զգալի թվով սպիտակ էջեր ու պարզաբանման կարոտ հարցեր կան։ Այն հայ ժողովրդի ազատագրական պայքարի հերոսական էջերից է, ինքնահաստատման ու դաժան գոյապայքարի խոսուն վկան։

Ինչպես ասվեց, Մարաշից հետո Փրանսիական թուրքապատ քաղաքականութեան զոհը դարձավ Հաճընը, որը, ի տարբերություն Մարաշի, Այնթապի և Ուրֆայի, ամբողջովին թողնված էր սեփական բախտին։ Հայերին պաշտպանելու համար ոչ մի Փրանսիական զինվոր մուտք չէր գործել Հաճըն։ 1918 թ. գինադարից հետո հրաշքով կենդանի մնացած հաճընցիները, որոնք «կը փափաքին, որ այս երկիրը Փրանսայի իշխանութեան տակ իյնայ», ցնծութեամբ սկսեցին վերագաղթել և, դրսևորելով անընկճելի կամք, շինարար ու ստեղծագործ իրենց բնույթի համաձայն, կարճ ժամանակում կարողացան ավերակների միջից բարձրացնել հարազատ քաղաքը, վերակենդանացնել հայրենի օջախները։ Սակայն «հագիւ վերադարձած հայրենիք, միջկուսակցական պայքարը կը սկսէր իր աւերը գործել, ինչ որ մանաւանդ Հաճընի պարագային, ճակատագրական ազդեցութիւն պիտի ունենար»¹⁹։

Մարաշի հաջողութունից քաջալերված՝ քեմալականները տենդագին գործունեություն են ծավալում Հաճընը պաշարելու ուղղությամբ։ Զգալով վերահաս վտանգը՝ տեղի հայերը, փաստաբան Կարապետ Չալյանի նախաձեռնությամբ, կազմեցին ինքնապաշտպանութեան բարձրագույն խորհուրդ (նախագահ՝ Հաճընի հոգևոր առաջնորդ Պետրոս Սարաճյան), որի հրամանով գորակոչվում են քաղաքի 15–60 տարեկան բոլոր տղամարդիկ։ Պաշտպանության հրամանատար նշանակվեց Անդրանիկ Օզանյանի զինակից, սպա Սարգիս Ճեպեճյանը, տեղակալ՝ Արամ Թերզյանը։ Կազմակերպվեց չորս վաշտ (հրամանատարներ՝ Կ. Օղուլլուքյան, Մ. Շիրքումյան, Մ. Մանասյան, Վ. Ալթունյան) և 60 հեծյալից բաղկացած էսկադրոն (հրամանատար՝ Պ. Թերզյան)։ Բոլոր դիրքերն էլ լեռնային էին, որը բավական հեշտացնում էր ինքնապաշտպանության գործը։ Ինքնապաշտպանության կենտրոնատեղի է դառնում Սբ. Աստվա-

¹⁵ ՀԱԱ, ֆ. 430, ց, 1, գ. 340, թ. 1–2։

¹⁶ Հայոց պատմություն. 2010, 226, Ա ը գ ու մ ա ն յ ա ն. 1973, 419։

¹⁷ Թ է ր գ ե ա ն. 1956, 69։

¹⁸ Ծ ե ր ե ճ ե ա ն. 2022, 248։

¹⁹ Յ ա փ ու ճ ե ա ն. 1977, 584։

ծածին եկեղեցին: Ստեղծվեցին պաշտպանությունն ապահովող այլ մարմիններ ևս: Տղամարդկանց բաժանվեց 132 հրացան, հետագայում ևս՝ 300-ը և 200 ուռմբ²⁰: Հաճընը և չրջակայքը բաժանվեցին պաշտպանական 4 չրջանի, փորվեցին խրամատներ, կառուցվեցին դիրքեր ու այլ ամրություններ, քաղաքում պարետային ժամ սահմանվեց²¹: Այդ օրհասական պայմաններում, երբ Հաճընի կապն արտաքին աշխարհի հետ խզված էր, իսկ դրսից ակնկալվող օգնությունը՝ բացառված, հաճընցիները ստիպված էին անհավասար կռիվ մղել քեմալական զերակշիռ ուժերի դեմ:

Ֆրանսիայի զինվորական ներկայացուցիչները, որոնց «քաղաքական ուղղությունը երկիրը իսլամական քաղաքակրթությունից կառավարելն էր»²², բավարարվեցին հաճընցիներին մի քանի հարյուր հրացան տալով, բայց միաժամանակ թուրքերին տեղյակ պահեցին հայերի ինքնապաշտպանական քայլերի մասին: Շրջակայքի թուրքերն էլ, որոնց «ղեկավարում էին մեծ թվով սպաներ, ունեին լեռնային թնդանոթներ, գնդացիներ և զինամթերքի ահագին պաշար»²³, «կհավաքվին, կզինվին և կապանեն ձյունհալին՝ Հաճընով վրա հարձակվելու համար»²⁴ և ամեն ռոպե հարձակման նշանի էին սպասում:

Մինչ այդ՝ 1919 թ. ամռան ընթացքում, չրջակա քեմալական գործիչները հայերի դեմ պայքարի կոչեր էին անում: Եվ ոչ միայն նրանք, որ «Ֆրանսացիներու քթին տակը սոսկալի պատրաստություններ տեսած են (մենք ալ գիտէինք, կ'ըսէինք ու կարեւորութիւն չէինք տար) և թէ դեռ ի՞նչ պատահականութիւններ կախուած կան մեր գլխուն վրան»²⁵: Նրանց էին միացել նաև չրջանի քուրդ ու չերքեզ առաջնորդները: Այդ ամենից տեղյակ Ֆրանսիական իշխանություններն էլ քաջալերում էին քեմալականներին²⁶:

1920 թ. փետրվարի 22-ին Ս. Ճեպեճյանը հավաստի աղբյուրներից տեղեկանում է՝ զգալի թվով թուրքական զորքեր են կենտրոնանում Հաճընի վրա հարձակվելու համար, և որ գավառի 60 հազարից ավելի թուրքերն էլ հրամանի են սպասում: Ինքնապաշտպանության խորհուրդը որոշում է այդ մասին տեղեկացնել գնդապետ է. Բրեմոնին և Պետրոս Սարաճյանի գլխավորությամբ պատվիրակություն է (Հարություն Խաչատրյան, Շմավոն Փոսթոյան) ուղարկում Ադանա²⁷: Նրանց առաջադրանքն էր՝ հանդիպել գնդապետ է. Բրեմոնին և օգնություն խնդրել, Հաճընին օգնելու համար կամավորական ջոկատ ստեղծել, նաև ցանկացած արդյունքի մասին «հեռագրով հրահանգ տալ՝ դիմադրելու կամ նահանջելու»²⁸:

Մարտի 7-ին պատվիրակությունը Սահակ կաթողիկոս Խապայանի ու Ագգային պատվիրակության լիազոր-ներկայացուցիչ Միհրան Տամատյանի հետ

²⁰ ՀԱԱ, ֆ. 408, ց. 1, գ. 142, թ. 13, նաև՝ Արամ Ասպետ. 1961, 205:

²¹ Պօղոսեան. 1942, 857:

²² ՀԱԱ, ֆ. 430, ց. 1, գ. 817, թ. 19-39:

²³ ՀԱԱ, ֆ. 200, ց. 1, գ. 546, թ. 17-19:

²⁴ Մատենադարան, Ա. Ալպոյաճյանի արխիվ, թղթ. 14, վավ. 29:

²⁵ ՀԱԱ, ֆ. 430, ց. 1, գ. 295, թ. 21-29:

²⁶ Մանջյան. 1991, 39:

²⁷ ՀԱԱ, ֆ. 408, ց. 1, գ. 124, թ. 1-2, Մատենադարան, Ա. Ալպոյաճյանի արխիվ, թղթ. 14, վավ. 29, թ. 2:

²⁸ Մատենադարան, Ա. Ալպոյաճյանի արխիվ, թղթ. 14, վավ. 29, թ. 3:

Հանդիպում է Բրեմոնին և ռազմական օգնություն խնդրում: Վերջինս պատասխանում է, որ կարող է միայն զենք ու պարեն տրամադրել, եթե կամավորական խմբեր կազմվեն: Որոշ չափով զենք-զինամթերք տրամադրվում է, սակայն այն չի հասնում Հաճըն. ճանապարհին ընդհարում է տեղի ունենում Կարապետ Լաչինյանի զինատար խմբի ու դարանակալած թուրքերի միջև և ողջ ռազմամթերքը (40 բեռ) անցնում է չեթենների ձեռքը²⁹: Մարտի 14-ին էլ Մ. Տամատյանի և Հաճընի պատվիրակության հետ հանդիպման ժամանակ Բրեմոնը հայտնում է, որ ավելորդ է անգամ խորհել օգնություն ուղարկելու մասին, ու հայ կամավորներին էլ արգելում է Հաճըն մեկնել³⁰:

Անագորույն ճակատագրին դեմ հանդիման մնացած Հաճընի Ազգային խորհուրդը մարտի 14-ին հեռագիր է ուղարկվում Մ. Տամատյանին, որում ասվում էր. «... եթե օգնություն չը փութաք, Հաճընը կը ջնջուի երկրի վրայէն»: Փաստորեն, ռազմական որևէ օգնության հույս չունեցող Հաճընցիները երկու ելք ունեին. ա) կազմակերպված նահանջել Սիս կամ բ) դիմել ինքնապաշտպանության, որը հավասարազոր էր «ժողովուրդը անձնասպանութեան մղելու»³¹, այսինքն՝ զիտակցական մահվան: Իհարկե, ամբողջական չըջափակումից խուսափելու նպատակով գերադասելի էր նահանջելը: Այդպես էին մտածում Հաճընցիների մեծ մասը: Դա է հաստատում նաև մարտի 14-ին Պ. Սարաճյանի՝ Հաճընի ինքնապաշտպանության բարձրագույն խորհրդին հղած «Քաղաքս վտանգէն գերծ պահելու համար բոլոր դիմումներս ապարդիւն մնացին. օգնութեան յոյս չի նշմարուի: Ուստի, միակ միջոցը ... ժամ առաջ Սիս հասնելու աշխատեցէք»³² բովանդակությամբ հեռագիրը: Իսկ հուշագիր Սոկրատ Թերզյանի ասելով՝ վերոհիշյալ հեռագիրը թվագրված է եղել մարտի 13-ով և այսպիսի բովանդակություն ուներ. «Կը ցաւիմ, որ բոլոր դիմումներս ապարդիւն մնացին: Ուեէ տեղէ օգնութիւն մի սպասէք: Անմիջապէս նահանջեցէք Սիս»³³:

Հաճընցիները որոշում են նահանջել Սիս և փրկվել ջարդերից: Սակայն Կիլիկիայի Ազգային խորհրդի անդամներն այլ մոտեցում ունեին Հաճընի պաշտպանության հարցին. «Կիլիկիայում բարձր քաղաքականություն ընդունողները Հաճընցիներուն նահանջը կը նկատեն ոչ միայն նվաստություն, այլև այդ շրջանին նկատմամբ ազգային իրավունքներու ժխտում»³⁴:

Այսպիսով, վերը նշված աղբյուրներում հիշատակված նույն հեռագիրը մի դեպքում թվագրված է մարտի 13-14-ին, իսկ մյուսում՝ միայն 13-ին: Սակայն Սարաճյանն իր հուշերում գրում է, թե հեռագիրն ուղարկված է մարտի 14-

²⁹ ՀԱԱ, ֆ. 408, ց. 1, գ. 124, թ. 1-2, Մատենադարան, Ա. Ալպոյաճյանի արխիվ, թղթ. 14, վավ. 29, թ. 12-13: Սիյունաքահայ հեղինակ Մ. Սեպուհի ասելով՝ զենք-զինամթերք տեղափոխող խմբին մատնել է էվերեկցի Արշակ Սեմիդյանը (տե՛ս Սեպուհ. 1960, 52):

³⁰ Մատենադարան, Ա. Ալպոյաճյանի արխիվ, թղթ. 14, վավ. 29, թ. 14, նաև՝ Յուզամատեան Մեծ եղեռնի (1915-1965). 1965, 876:

³¹ Ի գ մ ի ը Լ ե ա ն. 1964, 270:

³² Մատենադարան, Ա. Ալպոյաճյանի արխիվ, թղթ. 14, վավ. 29, թ. 16:

³³ Թ է ը գ ե ա ն. 1937, 257:

³⁴ Ի գ մ ի ը Լ ե ա ն. 1964, 270:

ին³⁵: Այսինքն՝ կարելի է ենթադրել, որ հեռագիրը գրվել է 13-ին, բայց ուղարկվել՝ 14-ին: Սարաճյանի այս հեռագրից անմիջապես հետո Աղանայից ևս մի հեռագիր է ուղարկվում Հաճըն: Հեռագիր, որի բովանդակությունը հուշագիրների մոտ տարբեր է: Այսպես՝ Հաճընի ինքնապաշտպանության երկրորդ վաշտի հրամանատար Մեսրոպ Շիրտմյանի տարբերակում ասված է. «Ասկէ առաջ Սարաճեանի ստորագրութիւնով եկած հեռագրին կարեւորութիւն մի տաք: Հաճըն զրկուելիք բաւական ուժեր պատրաստուած են: Վստահ եղէք թէ ամէն պարագայի տակ դուք էք և դուք պիտի ըլլաք յաղթողը»³⁶: Շիրտմյանի ասելով այս հեռագիրը ստորագրված է եղել Մ. Տամատյանի ու «Հաճընի պատվիրակության» կողմից՝ առանց Սարաճյանի ստորագրության³⁷: Իսկ ըստ Թերզյանի հեռագրի բովանդակությունն այսպիսին է. «Գաղթը ազգային արժանապատվութեան դէմ է: ... Կռիւր շարունակեցէք, քանի մը օրուան մէջ ձեզի 1200 հոգինոց օգնական ուժ պիտի հասնի: Օղանաւ ալ պիտի զրկենք: 14 մարտի 1920 Մ. Տամատեան, Յարանուական պետեր, Հաճընի Հայր. միութիւն»³⁸:

Ահա այս հեռագրի հիման վրա է, որ տեւական ժամանակ մամուլում³⁹ և, հատկապես, հուշագրական գրականության մեջ շրջանառվել է այն թյուր տեսակետը, թե Հաճընի ողբերգության մեջ մեղքի մեծ բաժին է ունեցել Կիլիկիայում Ազգային պատվիրակության լիազոր-ներկայացուցիչ Մ. Տամատյանը⁴⁰: Հետագայում ևս Ս. Թերզյանը, Մ. Սեպուհը և նրանց ձայնակցող այլ հուշագիրներ, տուրք տալով կուսակցականությանը և հենվելով ոչ իրական փաստերի վրա, 6000 հաճընցիների կոտորածի համար պատասխանատու են համարել Մ. Տամատյանին:

Այդ ոչ ճիշտ տեսակետն, ավել կամ պակաս չեղտադրությամբ, կրկնվել է նաև հիմնախնդրին անդրադարձած որոշ ուսումնասիրողների մոտ: Այսպես. «Նույն օրը, – գրում է Ռ. Սահակյանը, – խաբվելով Բրեմոնի՝ իրեն հասցեագրված 1920 թ. մարտի 14-ի թվակիր նամակում արտահայտած այն կարծիքից, թե հաճընցիների «ամբողջական մեկնումը առանց կռիւ Եվրոպայի առաջ իրենց համար պիտի ըլլա վնասակար», և որ «Հայաստանի բարձր համբավին տեսակետովը անհրաժեշտ է, որ այդ նահանջը չկատարվի»⁴¹: Մ. Տամատյանը, Ազգային միությունը և Հաճընի հայրենակցական միության անդամներն այսպիսի հեռագիր են ուղարկում հաճընցիներին:

³⁵ Մատենադարան, Ա. Ալպոյաճյանի արխիվ, Թղթ. 14, վավ. 29, Թ. 16: Սակայն Սարաճյանը հեռագրի տեքստը չի ներկայացնում: Դրա մասին տեղեկանում ենք Հ. Պողոսյանի և Հաճընի ինքնապաշտպանության մասնակից Ս. Թէրզեանի տեքստերից, որոնք, ի դեպ, զգալի տարբերվում են միմյանցից:

³⁶ Շիրտմեան. 1974, 53:

³⁷ Շիրտմեան. 1974, 53, Պողոսեան. 1942, 652:

³⁸ Թէրզեան. 1956, 258: Իսկ Կ. Իզմիրլյանը հուշերում գրում է, որ Մ. Տամատյանը Հաճըն հեռագիր էր ուղարկել իր և Պ. Սարաճյանի ստորագրությամբ [տե՛ս «Նոր Հաճըն» (Աղանա), 1966, 271]:

³⁹ «Կիլիկիա», 03. VI. 1919, 15. VI. 1919:

⁴⁰ Պողոսեան. 1942, 652, Թէրզեան. 1956, 257, Մանջյան. 1991, 96:

⁴¹ Սահակյան. 1970, 174:

Կիլիկիայի Ազգային խորհրդի անդամները, մասնավորապես՝ նրա նախագահ Մ. Տամատյանը, «թյուրիմացության մեջ ընկնելով է. Բրեմոնի կողմից, թե միջազգային առումով «Հայաստանի բարձր համբավի տեսակետովը անհրաժեշտ է, որ այդ նախանշը չկատարվի», քաղաքական անհեռատեսություն դրսևորելով, հեռագիր են հղում Հաճրն. «Գաղթը ազգային արժանապատվության դեմ է: Դուք Հայու վայել և Հաճրնցի քաջությամբ կռիվը շարունակեցեք, քանի մը օրվան մեջ ձեզի 1200 հոգիանոց օգնական ուժ պիտի հասնի: Օղանալ ալ պիտի դրկենք: Ս. Սարգիսին բլուրին վրա ճերմակ խաչ մը չինեցեք, որպեսզի ծրարները հոն նետեն»⁴²: Իհարկե, նման բովանդակությամբ հեռագիրը ոգևորում է Հաճրնցիներին, սակայն սպասված օգնությունն այդպես էլ չի լինում⁴³: Այնուհետև Ռ. Գասպարյանը դժվարանում է բացատրել, թե ինչով է առաջնորդվել Տամատյանը, որ այդպիսի հեռագիր է ուղարկել, բայց, այնուամենայնիվ, այդ քայլը համարում է «քաղաքական լուրջ սխալ, որը ողբերգական հետևանքներ ունեցավ»⁴⁴: Հետո էլ փորձելով որոշ չափով «մեղմել» Տամատյանի մեղքը՝ Ռ. Գասպարյանը նշում է չի կարելի նաև վատահայն կարծիքը հայտնել, որ դեպի Սիս նախանշը կապահովեր Հաճրնցիների փրկությունը, քանի որ այդ դեպքում նրանք Հաճրնին զենք-զինամթերք տանող և օգնության հասնող կամավորականների նման զոհ կգնային ճանապարհին դարանակալած թշնամական ուժերին: Մի բան, որն ուղղակի հաստատում է այն իրողությունը, թե մարտի 13-ին Պ. Սարաճյանի հղված նախանշի ուղին բռնելու խորհուրդ պարունակող հեռագիրը Հաճրնցիները ստացել էին մարտի 14-ին, իսկ հաջորդ օրը քաղաքն ամբողջովին չրջափակվել էր քեմալական հրամանատար Կոզան օղլի Դողանի ջոկատների կողմից:

Փորձենք պարզաբանել, թե այդ տեսակետը որքանով է իրատեսական, արդյո՞ք հիմնավոր է այս ամբաստանությունը: Իրականությունն այն է, որ մարտի 15-ին Մ. Տամատյանն Ազգային միության և միջկուսակցական խառը ժողով է հրավիրում ու տեղեկացնում է. Բրեմոնը Սսի օրվա կառավարիչ Թայարդայի միջոցով հրաման է հեռագրել Հաճրնի գայմագայմ Կ. Չալյանին, որ «պատրաստուին նախանշել կիները, մանուկները և ծերերը», ու որոնց անվտանգությունն ապահովելու համար ֆրանսիական զինվորներ կուղարկվեն, իսկ «զենք բռնող տղամարդիկ պետք է Հաճրն մնան և զայն պաշտպանեն»: Ի պատասխան՝ Հաճրնի գայմագայմը հայտնել է, որ իրենց ընտանիքներին ուղարկելուց հետո տղամարդիկ չեն ուզում մնալ «միայն քաղաքի ավերակներ-

⁴² Գ ա ս պ ա ռ յ ա ն. 2005, 181:

⁴³ «Հաճրնի ինքնապաշտպանութեան միջոցին, երկու անգամ ֆրանսական զինուորական օդանավ կը յայտնուի երկնքին վրայ: Ա. Անգամ Մարտ 16-ին, որ նամակներու ծրար մը կը ձգէ Հաճրնի հիւսիսարեւելեան ծայրամասը: Նամակներէն կը պարզուի, որ Սիսի մօտ կը կատարուի կամաւորահաւաք եւ կամաւորներու մեծ խումբ մը պատրաստ է Հաճրն օգնութեան գալու: Բ. Անգամ Մարտի 28-ին, որ Ս. Սարգիսի «օղակայանին» վրայ պտոյտ կատարելէ եւ սնտուկ մը ուղևական փամփուշտ նետելէ ետք կը հեռանայ», – գրում է Ե. Զերեճեանը (տե՛ս Զ ե ռ ե ճ ե ա ն. 2022, 251):

⁴⁴ Գ ա ս պ ա ռ յ ա ն. 2005, 181:

ընդ պաշտպանելու համար, ուստի որոշած են ամբողջովին նահանջել»⁴⁵։ Միևնույն ժամանակ Մ. Տամատյանը մարտի 15-ին տեղի ունեցած Ազգային միություն և միջկուսակցական խառը ժողովի մասնակիցներին տեղեկացնում է, որ Բրեմոնն իրեն հանձնարարել է «համոզել հաճընցիները, որ բարձրագույն հրամանին համեմատ չարժուին»։ Բրեմոնի այս հրամանի վերաբերյալ բուռն վիճաբանություն է տեղի ունենում հիշյալ ժողովում։ Ի վերջո՝ մարտի 15-ին Ազգային միություն ու միջկուսակցական խառը ժողովում որոշվում է հրահանգել հաճընցիներին չնահանջել և սպասել նյութական ու զինական օգնության։ Այդ նույն ժողովում նաև որոշվում է՝ դրա մասին հեռագիր պետք է ուղարկվի և անպայման Սարաճյանի ստորագրությամբ՝ չիմանալով, որ Սարաճյանը մարտի 14-ին հաճընցիներին հեռագրել էր անհապաղ Միս նահանջել։ Որոշվում է, որ Պ. Սարաճյանը հեռագիր ուղարկի Հաճըն և «հրահանգ տալ, որ չնահանջեն և ամբողջությամբ հոն մնան ...»։ Սակայն Սարաճյանը հաճընցիներին հեռագրում է. «Երէկուան հեռագիրս կը հաստատեմ, կէտ առ կէտ գործադրեցէք, առանց ուրիշներուն մտիկ ընելու»։ Իսկ Հաճընի հեռագրով չիմանալով որը չեթեմների կողմից Վահկայի և Հաճընի միջև կտրված էր, ու հեռագիրը տեղ չի հասնում⁴⁶։ Ժողովին էլ, հաշվի չառնելով Սարաճյանի կարծիքը, միասնաբար որոշում է հեռագրել Հաճըն՝ «չը նահանջել, դիմադրել և օգնություն սպասել»⁴⁷։ Բնականաբար, պաշտոնի բերումով այն հղվում է Մ. Տամատյանի անունից և դառնում է չեթեմների կողմից օղակված Հաճըն հասած վերջին հեռագիրը։

Քննարկելով խնդիրը՝ այս հարցերին քաջատեղյակ Ռ. Սահակյանը հետևություն է անում՝ Տամատյանի «այդ հեռագիրն էր, որը ողբերգական հետևանքներ ունեցավ քաղաքի 6 հազար հայ ազգաբնակչության համար»⁴⁸։ Սակայն հետո ավելացնում է. «Եթե նույնիսկ հայ կամավորներին հաջողվեր հասնել Հաճըն, կամ եթե Փրանսիական զինվորական իշխանությունները մեծ քանակությամբ զենք և ռազմամթերք տրամադրեին հաճընցիներին, միևնույն է, վերջիններս ի վիճակի չէին լինի երկար ժամանակ կռվել քեմալական կանոնավոր զորքի դեմ, որոնց թիվն օրստօրե բազմապատկվում էր»⁴⁹։ Առավել ևս, որ Փրանսիական իշխանությունները թեև հայտարարում էին, որ «Հաճընը Փրանսիական զրավման և վարչության մաս են կազմում», սակայն Կիլիկիայում վերը նշված պատճառներով ամենևին էլ մտադիր չէին զորք ուղարկել Հաճըն։

1920 թ. մարտի կեսերին Հաճընի ինքնապաշտպանության ղեկավարները վճռականորեն մերժեցին թուրքական հրամանատարության կողմից ներկայացված անձնատուր լինելու վերջնագիրը և պատրաստվեցին պաշտպանություն։ Ապրիլի 1-ին թուրքերը չրջապատեցին քաղաքը և անցան հարձակման, բայց հաճընցիները հերոսաբար պաշտպանվում էին։ Ծանր մարտերը շարունակվեցին մինչև հուլիսի 12-13-ը, երբ թուրքական հրամանատարությունը

⁴⁵ Մատենադարան, Ա. Ալպոյաճյանի արխիվ, թղթ. 14, վավ. 29, թ. 17։

⁴⁶ Մատենադարան, Ա. Ալպոյաճյանի արխիվ, թղթ. 14, վավ. 29, թ. 19։

⁴⁷ Մատենադարան, Ա. Ալպոյաճյանի արխիվ, թղթ. 14, վավ. 29, թ. 29։

⁴⁸ Սահակյան. 1970, 176։

⁴⁹ Սահակյան. 1970, 177։

փորձեց բանակցությունների միջոցով ծնկի բերել հաճընցիներին, սակայն ապարդյուն: Մուստաֆա Քեմալի հրամանով համալրում ստացած թուրքական զորքերը հոկտեմբերի 14-ին անցան լայնածավալ հարձակման և 15-ին գրավեցին Հաճընը, հրկիզեցին այն ու կոտորեցին 6000 հայի: Միայն 365 հոգու հաջողվեց դուրս գալ շրջապատումից: «Հաճընը ոչ ևս է»․ մահազդի ձևով Հաճընի անկման լուրն առաջինը հայտնեց Ադանայի «Տավրոս» թերթը 1920 թ. հոկտեմբերի 24-ին⁵⁰:

Եզրակացություն

1. Առաջին աշխարհամարտից հետո մեծ թվով կիլիկիահայեր, այդ թվում՝ հաճընցիներ, ապավինելով Ֆրանսիայի հովանավորությանը, վերադարձան հայրենի օջախներ: Թուրքամետ քաղաքականություն որդեգրած Ֆրանսիան, մերձենալով քեմալականներին, լքեց Կիլիկիան, որի հետևանքով տեղի հայությունը ևս մեկ անգամ ապրեց ցեղասպանության սարսափները:

2. Դիվանագիտական խարդավանքներից անտեղյակ հաճընցիները, վստահ լինելով, որ Ֆրանսիան կօգնի, դիմեցին ինքնապաշտպանության և հերոսաբար կռվեցին: Սակայն ուժերը խիստ անհավասար էին. պարտվեցին ու սկսեցին դրա համար մեղավորներ փնտրել:

3. Ոմանք Հաճընի անկման համար մեղադրել են Մ. Տամատյանին: Սակայն վերը հիշատակված փաստերն ապացուցում են՝ դա Ֆրանսիական զինվորական իշխանությունների թրքանպաստ դիրքորոշման արդյունք էր, քանի որ իր շահերից ելնելով՝ Ֆրանսիան վաճառքի էր հանել ողջ կիլիկիահայությունը: Մ. Տամատյանին մեղադրելու համար հիմք է ծառայել մարտի 14-ին չնահանջելու մասին հաճընցիներին ուղարկված հեռագիրը: Կարծում ենք, որ դա հիմնավոր չի, քանի որ. ա) հուշագիրները միշտ չէ, որ օբյեկտիվ են եղել և ճշգրիտ ներկայացրել եղելությունները: Օրինակ՝ Մ. Տամատյանի հասցեին ամենախիստ մեղադրանք (որին հենվելով նույնը կրկնել են նաև մյուսները) ներկայացրած Ս. Թերզյանը հերոսամարտի մասին հուշագրել է տասնյակ տարիներ հետո և խոստովանում, որ «թեև ջանացել է հնարաւորութեան սահմանին մէջ ճշգրտորէն նկարագրել», բայց «առանց ունենալու անհրաժեշտ օրագրութիւններ»⁵¹: Հետևաբար, կարող էր նաև սխալվել: Բ) Այդ չարաբաստիկ հեռագիրը, Հաճընի պատվիրակության անդամների համաձայնությամբ, ստորագրել են ոչ միայն Մ. Տամատյանը, այլև Կիլիկիայի Ազգային խորհրդի և Հաճընի Հայրենակցական միության ղեկավարները: Հետևաբար, միայն նրան մեղավոր համարելը, իհարկե, ճիշտ չէ: Գ) Եթե նույնիսկ չլինեք այդ հեռագիրը, և հաճընցիները նահանջեին Միս, ապա այդ դեպքում ևս նրանք չէին խուսափի ցավալի վախճանից և Հաճընին օգնության հասնող կամավորականների նման զոհ կգնային ճանապարհին դարանակալած թշնամիներին, քանի որ Հաճընից դեպի այլ վայրեր տանող բոլոր ճանապարհները հսկվում էին չեթենների⁵²:

⁵⁰ Պ օ ղ ո ս ե ա ն. 1942, 718:

⁵¹ Թ է ր գ ե ա ն. 1956, 9:

⁵² Եղեռնի ժամանակ բանտերից հատուկ ազատ արձակած հանցագործների հրոսակախմբեր՝ հայերին կոտորելու համար, ելուզակ, ոճրագործ, ավազակ, այս դեպքում՝ քեմալական անկանոն ուժեր:

կողմից: Դրա մասին է վկայում այն իրողությունը⁵³ 40 բեռ զինամթերքը, որ ֆրանսիացիները խոստանում էին Ստում տրամադրել հայ կամավորներին, մարտի 10-ին ամբողջությամբ ընկավ չեթենների ձեռքը⁵⁴: Իսկ եթե լավ զինված ու քաջաբար կռված 80-ից միայն 18–20 հոգու վիրավոր և ամբողջ զինամթերքը կորցրած վիճակում էր հաջողվել հասնել քաղաք, ապա ոչ այնքան լավ զինված ու մեծաքանակ անզեն բնակչության առկայության դեպքում պատկերն ավելի ողբերգական կլիներ: Դ) Իր անտիպ հուշերում Պ. Սարաճյանը նահանջի մասին երկրորդ հեռագրի որևէ տեքստ չի հիշատակում, դա անում են այլ հուշագիրներ և տարբեր տեքստեր են ներկայացնում: Ակամա հարց է առաջանում. ինչու⁵⁵, ինչպե՞ս կարող էր հեռագրի հեղինակը որևէ տեքստ չներկայացնել և ինքն իրեն արդարացներ, բայց դա անում են ուրիշները: Հարց, որը ցայսօր բոլորի մոտ անպատասխան է մնացել:

4. Հաճընի ողբերգության համար մեղավորներ պետք չէ փնտրել. հարկավոր է տարիներ անց գոնե սթափ գնահատել ստեղծված իրավիճակը, օբյեկտիվ հետևություններ կատարել և դրանցից դասեր քաղել: Այն փաստը, որ մարտի 14-ին է. Բրեմոնը, Պ. Սարաճյանին և Մ. Տամատյանին հրավիրելով, պարզորոշ ներկայացրել է իրենց դիրքը՝ «ապարդիւն է դժուարին լեռներով Հաճընին օգնութիւն ուղարկել. այդ մասին խորհել անգամ աւելորդ է»⁵⁵, արդեն խոսում է անխուսափելի վախճանի մասին: Հասկանալի է՝ որևէ հեռագիր ոչինչ չէր կարող փոխել:

5. Ազատագրական պայքարի նվիրյալ Մ. Տամատյանը զենքը ձեռքին մարտնչելով, Մուշի ու Սասունի գյուղերը շրջելով ու քարոզչություն կատարելով, ինչպես նաև գրչով ու դիվանագիտական ազդեցությամբ ծառայություններով ողջ գիտակցական կյանքը նվիրաբերել է իր ժողովրդին: Դրա դրսևորումը եղավ նաև այն, որ այլ ելք չտեսնելով 1920 թ. օգոստոսի 4-ին նա համախոհների հետ Ադանայում Ֆրանսիայի հովանավորությամբ Ինքնավար Հանրապետություն հռչակեց: Սակայն թուրքամետ ֆրանսիական զինվորականներն ուժով ցրեցին այն: Ֆրանսիացիների «ասպետական» այդ կեցվածքից հիասթափված Տամատյանը հեռացավ Կիլիկիայից: Մինչև վերջին շունչը իր ժողովրդին նվիրաբերած գործչի հասցեին հանիրավի մեղադրանքներ հնչեցնելը, մեղմ ասած, շնորհակալ գործ չէ և սերունդներ դաստիարակելուն վնասակար: Ուստի ժամանակն է հրաժարվել ոչ գիտական մոտեցումներից և ցանկացած հարց լուսաբանել պատմականության և օբյեկտիվ տեսանկյունից:

6. Հաճընի հերոսամարտն, անկասկած, թուրքական ջարդարարների դեմ հայ ժողովրդի մղած պայքարի հերոսական էջերից է և ուսանելի շատ կողմեր ունի:

Սուրեն Սարգսյան – պ. գ. դ., պրոֆ., ՀՀ ԳԱԱ պատմության ինստիտուտի նոր պատմության բաժնի առաջատար գիտաշխատող: Գիտական հետաքրքրությամբ

⁵³ Այդ մասին վկայում են մեր կողմից հիշատակված բոլոր հուշագիրները և ուսումնասիրողները (Թ է ր գ ե ա ն. 1956, Գ ա ս պ ա ր յ ա ն. 2005, Ս ա հ ա կ - յ ա ն. 1970 և այլն):

⁵⁴ ՀԱԱ, ֆ. 408, ց. 1, գ. 124, թ. 1–2:

⁵⁵ Մատենադարան, Ա. Ալպոյաճյանի արխիվ, թղթ. 14, վավ. 29, թ. 14:

յունները՝ Հայ աթանդական կուսակցություններ, ազգային-ազատագրական պայքարի գաղափարախոսություն, Հայ պարբերական մամուլ, ազատագրական պայքարի նվիրյալներ: Հեղինակ է 8 մենագրության և ավելի քան 150 հոդվածի: sargsyansuren@yandex.ru

ԳՐԱԿԱՆՈՒԹՅՈՒՆ

- Արամ Ասպետ. 1961, Պրուագներ Հաճընոյ հերոսամարտէն, Պէյրութ, 242 էջ:
- Արզումանյան Մ. 1973, Արհավիրքից վերածնունդ, Երևան, «Հայաստան», 580 էջ:
- «Արեւ» (Կահիրէ), 24. VIII.1951:
- Գասպարյան Ռ. 2005, Հայկական կոտորածները Կիլիկիայում, Երևան, ՀՀ ԳԱԱ «Գիտություն» հրատ., 246 էջ:
- Թերզեան Յ. Սոկրատ. 1956, Հաճընի ութամսեայ դիւցազնամարտը, Բ. տպագրութիւն, Պուլնոս Այրէս, տպարան «Արարատ», 702 էջ:
- Իզմիրլեան Կ. 1964, Հայ ժողովուրդի քաղաքական ճակատագիրը անցեալին և ներկայիս (քննական տեսութիւն), Պէյրութ, 314 էջ:
- Կառվարենց Գ. 1922, Ամբողջ ինն ամիս պայքար անմոռաց..., Կ. Պօլիս, 67 էջ:
- «Կիլիկիա» (Ադանա), 03. VI. 1919, 15 VI. 1919:
- Հայոց պատմություն. 2010, հ. IV, գիրք առաջին. Նորագույն ժամանակաշրջան (1918–1945 թթ.), Երևան, «Զանգակ-97» հրատ., 797 էջ:
- Հայաստանի ազգային արխիվ (ՀԱԱ), ֆ. 200, ց. 1, գ. 546, թ. 17–19, ֆ. 408, ց. 1, գ. 142, թ. 13, գ. 124, թ. 1–2, ֆ. 430, ց. 1, գ. 295, թ. 21–29, ց. 1, գ. 807, թ. 1–3, ց. 1, գ. 340, թ. 1–2, ց. 1, գ. 817, թ. 19–39:
- Ճերեճեան Ե. 2022, Հաճընի ինքնապաշտպանական կռուիներուն մասին. – ՊԲՀ, № 1, էջ 248–256:
- Մատենադարան, Ալպոյաճյանի արխիվ, թղթ. 14, 29, թ. 2 (Հաճընի առաջնորդ Պետրոս Սարաճյանի անտիպ հուշերը «Հաճընը ինչու նահանջեց և ընկավ»), թ. 12–13, թ. 14, թ. 15, թ. 16, թ. 17, թ. 19:
- Մանջյան Հ. 1991, Հաճընի հերոսական ինքնապաշտպանությունը 1920 թվականին, Երևան, «Նարեկացի» հրատ., 95 էջ:
- Նաթանեան Մ. 1990, Արմենական կուսակցութիւն, ծագումէն սկսեալ մինչև Սահմանադրական Ռամկավար կուսակցութեան կազմութիւնը, Գահիրէ, 106 էջ:
- «Նոր Հաճըն» (Ադանա), 1966, թիվ 10:
- Յափուճեան Ա. 1977, Հայ ժողովրդին անկախութեան պայքարը Կիլիկիոյ մէջ 1919–1921 թթ., Գահիրէ, մատենաշար Հայ ազգային հիմնադրամի, 1086 էջ:
- Յուշամատեն Մեծ Եղեռնի (1915–1965). 1965, պատրաստեց Գերսամ Ահարոնեան, Պէյրութ, 1100 էջ:
- Շխրտմեան Մ. 1974, Սոռաջուած դէպքեր եւ դէմքեր Հաճընոյ 1920-ի հերոսամարտին, Նիկոսիա, 121 էջ:
- Պօղոսեան Յ. 1942, Հաճընի ընդհանուր պատմութիւնը և շրջակայ Գօզան Տաղի հայ գիւղերը, Լոս Անճէլըս, 652 էջ:
- Սեպուհ Մ. 1960, Հաճընի ողբերգութիւնը, Հալեպ, տպարան «Անի», 219 էջ:
- Սահակյան Ռ. 1970, Թուրք-ֆրանսիական հարաբերությունները և Կիլիկիան 1919–1921 թթ., Երևան, Հայկական ՍՍՀ ԳԱ հրատ., 325 էջ:

Սաֆրաստյան Ռ. 2019, Մուսաֆա Քեմալ. պայքար Հայաստանի Հանրապետության դեմ (1919–1921 թթ.), Երևան, «ՏԻՐ» հրատ., 140 էջ:

Боев Ю. А. 1964, Ближний Восток во внешней политике Франции 1898–1914.– Очерки истории дипломатической борьбы Франции за Ближний Восток. Киев, «Наука думка», 336 с.

Ллойд Джордж. 1957, Правда о мирных договорах, т. II. М., Изд-во иностранной литературы, 560 с.

Кемаль-Ататюрк Мустафа. 1929, Путь новой Турции, 1919–1927. Первые шаги национально-освободительного движения, 1919, т. I. М., Литиздат НКВД, 480 с.

«Новый Восток» (М.), 1923, № 3.

Materne M. Le massacr de Marache (Fevrier 1920), Extralt du «Flambeau», revue belge des questions politiques et litteraires, 4 e annee, № 1, janvier 1921.

ГЕРОИЧЕСКАЯ БИТВА АЧНА: ПРИЧИНЫ ПОРАЖЕНИЯ И ВОПРОС ОТВЕТСТВЕННОСТИ

СУРЕН САРГСЯН

Резюме

Ключевые слова: Киликия, Ачн, героическая битва, автономия, экономические интересы, самооборона, поражение, французская военная власть.

После Мудросского перемирия (30 октября 1918 г.), поверив обещаниям французских властей, спасшиеся от Геноцида армяне Киликии вернулись в места своего проживания и начали обустройство родных очагов. Пользуясь существующими противоречиями между великими державами, оставшиеся у власти турецкие правители в основном поддерживали Кемаль-пашу, осуществившего переворот в Турции и приступившего к восстановлению страны, и, как прежде, «по-турецки» впряглись в дело деарменизации армянонаселенной Киликии.

С апреля по октябрь 1920 года городу Ачн удавалось героически сопротивляться, но силы были крайне неравны, и защитники Ачна потерпели поражение. Некоторые исследователи несправедливо обвинили в трагедии Ачна преданного борца армянского национально-освободительного движения М. Таматяна. Однако это не имеет ничего общего с реальностью.

Сурен Саргсян – д. и. н., проф., ведущий научный сотрудник отдела новой истории Института истории НАН РА. Научные интересы: армянские традиционные партии, идеология национально-освободительной борьбы, армянская периодическая печать, подвижники освободительной борьбы. Автор 8 монографий и более 150 статей. sargsyansuren@yandex.ru

THE HEROIC BATTLE OF HACHIN: THE CAUSES OF DEFEAT
AND THE QUESTION OF RESPONSIBILITY

SUREN SARGSYAN

S u m m a r y

Key words: Cilicia, Hachin, heroic battle, autonomy, economic interests, self-defense, defeat, French military power.

After the Truce of Mudros (October 30, 1918), believing the promises of the French authorities, the Armenians of Cilicia who had escaped the Genocide returned to their places of residence and devoted themselves to the task of settling their homes. Taking advantage of the contradictions between the Great Powers, the Turkish rulers who basically remained in power mainly supported Kemal Pasha who carried out a coup in Turkey and began to rebuild the country, and as before, was in “Turkish way” engaged in the de-Armenization of the Armenian-populated Cilicia.

In 1920, from April to October, the city of Hachin managed to heroically resist, but the forces were extremely unequal, and the defenders of Hachin were defeated. Some researchers unfairly blamed the devoted fighter of the Armenian national liberation movement M. Tamatyan for the tragedy of Hachin. However, this has nothing to do with reality.

Suren Sargsyan – Doctor of Sciences in History, Professor. Leading Researcher at the Department of New History of the NAS RA Institute of History. Scientific interests: Armenian traditional parties, ideology of the national liberation struggle, Armenian periodical press, devotees of the liberation struggle. Author of 8 monographs and over 150 articles. sargsyansuren@yandex.ru